


ՎԵՆԵՐԱ ՄԱԿԱՐՅԱՆ

ՄՄ

**ՀԱՅԿԱԿԱՆ ՄԻԼԼԵԹԻ¹ ԿԱԶՄԱՎՈՐՈՒՄԸ
ԵՎ Կ. ՊՈԼՍԻ ՀԱՅՈՑ ՊԱՏՐԻԱՐԿՆԵՐԻ
ԻՐԱՎԱՍՈՒԹՅՈՒՆՆԵՐԸ
(ԺԵ.-ԺԹ. դդ.)**



իլլեթի կազմավորման պատմությունը. ԺԶ. դարասկզբին Օսմանյան կայսրությունը Հիմնականում ավարտեց իր արտաքին նվաճումները եւ ձեռնամուխ եղավ նվաճված երկրների կառավարման համակարգի մշակմանը:

Օսմանյան վարչական համակարգը բաղկացած էր երկու Հիմնական բաժանումներից՝ տարածքային (պրովինցիաներ) եւ դավանական: Պետությունը ժողովրդին դասակարգում էր ոչ թե ըստ էթնո-լեզվական, այլ՝ կրոնական պատկանելության: Օսմանյան կայսրության ոչ մուսուլման բնակչությունը, որը, համաձայն «Թահրիր դեֆթերիի» (Աշխարհագիր մատյաններ) փաստաթղթերի, մոտ ԺԶ. դարի կեսերին կազմում էր բնակչության 40 %-ը², բաժանված էր դավանական երեք համայնքների՝ միլլեթների՝ հույն-ուղղափառ, հայ-առաքելական եւ հրեա³:

¹ «Միլլեթ» արաբերեն բառ է եւ նշանակում է ազգ, ազգություն. Օսմանյան կայսրությունում այն ուներ այլ իմաստ՝ մատնանշում էր մարդու դավանական եւ ազգային պատկանելությունը, մասնավորապես՝ ոչ-մուսուլման լինելը. տե՛ս Ի. Ortaylı, Osmanlı İmparatorluğu'nda Millet Sistemi Türkler, Cilt 10, Ankara, 2002 [s. 216-220], pdf. p. 393-399, էջ 394, <http://www.meliksah.edu.tr/msen/wp-content/uploads/2014/06/turkler-cilt-10 splitted-and-merged.pdf>. նաև՝ Լ. Սահակյան, Բարձր Հայքի Բաբերդ, Սպեր, Դերջան գավառների տեղանուններն ու ժողովրդագրությունը 16-րդ դարի օսմանյան աշխարհագիր մատյաններում, Երևան, 2007, էջ 52:

² F. Öztürk, The Ottoman millet system, p. 79, footnote 44, www.journals.istanbul.edu.tr/iugaad/article/download/5000063916/5000059858. Օսմանյան կայսրությունը 5 անգամ է մարդահամար անցկացրել՝ 1831, 1881/82, 1893, 1906/7 եւ 1914 թվականներին: Համաձայն այդ տվյալների՝ կայսրության ոչ մուսուլման բնակչությունը 1831 թ. կազմել է 29.67 %, 1881/82 թ.՝ 26.61 %, 1906/7 թ.՝ 25.74 %, 1914 թ.՝ 18.88 %. այս մասին տե՛ս A. Güler, Osmanlı Devletinde Azinliklar [Minorities in the Ottoman State], Istanbul, 1997, էջ 128:

³ Հետագայում հաշվի առնելով կայսրությունում ստեղծված դավանական անջատումները՝ 1830 թ. օսմանյան իշխանությունները ճանաչեցին կաթոլիկ, իսկ 1847 թ. բողոքական

Միլլեթները ներհամայնքային կյանքում վայելում էին օրինական ինքնավարություն եւ ենթարկվում էին միլլեթ բաշուն (համայնքապետ), ալսինքն՝ յուրաքանչյուրն իր կրոնական համայնքի պատրիարքին կամ րաբին⁴։ Հոգեւոր համայնքը քաղաքական կառուցվածք ուներ եւ ոչ-մուսուլման համայնքների համար «ինքնուկառն աղբյուր» էր⁵։

Միլլեթի համակարգը հիմնված էր «զիմմի» ավանդույթան⁶ վրա, որը սահմանում էր հասարակական եւ անհատական կանոններ այն կրոնական փոքրամասնությունների համար, որոնք համարվում էին իսլամական պետության հպատակներ։ Հիմնվելով այդ ավանդույթան վրա՝ Օսմանյան կայսրությունը հաշվի էր առնում ոչ մուսուլմանների համայնքային ինքնությունը, հետեւում էր նրանց սոցիալ-կրոնական կարգերին, սակայն չէր ճանաչում որեւէ համայնքի ամբողջական ինքնավարություն⁷։

«Միլլեթ» եզրույթի ներկայիս սահմանումը՝ որպես տարբեր էթնիկ ենթախմբերից բաղկացած կրոնական բնույթի կազմակերպություն, ներկայացվում է հայտնի հեղինակ Իլբեր Օռտայլիի հետեւյալ սահմանման մեջ. «Միլլեթը կազմակերպության ձեւ է եւ օրինական կարգավիճակ, որն առաջացել է մոնոթեիկ կրոնի հետեւորդների (ehl-i zimmet)՝ կայսրությանը հպատակվելուց հետո՝ համաձայն պաշտպանություն չնորհող պայմանագրի (ahidname)»⁸։ Փաստորեն՝ մուսուլմանները հանդուրժում էին քրիստոնեական եւ հրեական համայնքները, քանի որ վերջիններիս դավանանքները համարվում էին «իսլամի ամենավաղ՝ ոչ ամբողջական եւ

միլլեթները։ Այս երկու անցատված մասերը՝ կաթոլիկ եւ բողոքական հասարակությունները, թեպետ կրոնադավանական սկզբունքով էին կազմված, այնուամենայնիվ, երկուսի կազմում էլ գերիշխում էին հայերը։ 1848 թ. կազմավորվեց նաեւ Մելքիթ միլլեթը (հույն կաթոլիկները)։ տնս **Մ. արք. Օրմանեան**, Հայոց Եկեղեցին, Կ. Պոլիս, 1912, էջ 92. **Է. Սեմերճեան**, Հայկական կեանքը արդի Հայկաի վաղ օսմանեան ժամանակաշրջանին, Ուսումնասիրական փորձ մը՝ հայ ընկերային կեանքի պատմութեան կառուցման համար՝ իսլամական աղբիւրներու օգտագործման անհշոթեամբ, «Տաթեւ» հայագիտական տարեգիրք, թ. 1, Հալէպ, 2008, էջ 268։

⁴ I. Colin, The Ottoman Empire, 1300-1650, the structure of power, Printed and bound in Great Britain by Mackays of Chatham, 2002, էջ 216. **Է. Սեմերճեան**, նշվ. աշխ. էջ 260։

⁵ F. Öztürk, նշվ. աշխ., էջ 73։

⁶ Sîu Cl. Cahen, Dhimma, Encyclopedie de l'Islam, par B. Lewis, Ch. Pellat et J. Shacht, t. II, Leyde E. J. Brill, Paris G. P. Maisonneuve, Larose S. A., էջ 234-238. **K. Hashemi**, The right of minorities to identity and the challenge of non-discrimination: a study on the effects of traditional muslims Dhimma on current state practices, 13 Int. J. Min., Gr. R., 2006։

⁷ F. Öztürk, նշվ. աշխ., էջ 73։

⁸ Sîu S. Barbieri, Ottoman Millet system and national-cultural autonomy. A distance dialogue, European Consortium for Political Research 41st Joint Sessions, University of Mainz, 11-16 March 2013, էջ 3-4, <https://ecpr.eu/Filestore/PaperProposal/3f7eeb14-eee4-4fa7-b849-7faed99f35f5.pdf>. **I. Ortayli**, նշվ. աշխ., pdf. էջ 395։

փոխարինված ձեւը»⁹: Բազմաստվածային պաշտամունքի հետեւորդներն ու կռապաշտները, հակառակը, ընդունվում էին որպես ստորադրյալ եւ դատապարտված էին մոլոսութեաններին ձուլվելու կամ ստրկութեան: Այլ կերպ ասած՝ նրանք իրավունք չունեին կապ հաստատել կայսրութեան հետ՝ դառնալով «զիմմիի ժողովուրդ» (*ahl al-dhimma, dhimmi*), «դաշինքի ժողովուրդ» (*dhimma*): Զիմմիներն իրավունք ունեին հետեւելու իրենց կրոնին՝ պայմանով, որ ճանաչեն իսլամի գերակայութիւնը եւ մոլոսութեան բնակչութեան նկատմամբ իրենց ստորադասութիւնը: Ոչ մոլոսութեան համայնքների եւ մոլոսութեանական պետութեան միջեւ հարաբերութիւնները կարգավորվում էին օրենքով¹⁰:

Արեւմտյան պատմաբանները, հիմնականում հղելով Բ. Բրուդին, կասկած են հայտնում միլլեթ համակարգի եւ նրա շրջանակներում հոգեւոր ղեկավարների ունեցած իրավասութիւնների վերաբերյալ¹¹: Նրանք կարծում են նաեւ, որ «միլլեթ» եզրույթը կրոնական համայնքները բնութագրելու համար օգտագործվել է միայն սկսած ժամ. դարասկզբից, իսկ մինչ այդ բնորոշել է կայսրութեան մոլոսութեաններին եւ կայսրութիւնից դուրս ապրող քրիստոնյաներին¹²:

Բ. Բրուդին ընդգծում է, որ ԺԵ.-ԺԶ. դդ. եւ ԺԹ. դարում «միլլեթ» եզրույթի արտահայտած իմաստները տարբեր էին, եւ դրանց տարբերութիւնը բացատրվում է լեզվական եւ քաղաքական հանգամանքներով: Նա այն համոզման է, որ ԺԵ. եւ ԺԶ. դդ. ընթացքում եվրոպական դիվանագիտական բառարաններում «միլլեթ» եզրը կիրառվել է օսմանյան շրջանակներում՝ բնորոշելով Օսմանյան կայսրութեան կրոնական ինքնավար համայնքները՝ որպես հոմանիշ “*cemaatlar*” եւ “*dhimmi*” եզրույթների (օսմանյան ավանդույթով երկուսն էլ գործածվել են բնորոշելու համար ոչ մոլոսութեան համայնքները)¹³: Սակայն օսմանյան պաշտոնական բնագ-

⁹ B. Braude, B. Lewis, Christians and Jews in the Ottoman Empire. The functioning of a plural society, London, 1982, p. 5.

¹⁰ S. Barbieri, նշվ. աշխ., էջ 3-4:

¹¹ “The Cambridge History of Turkey”, vol. 3, The later Ottoman Empire, 1603-1839, ed. by Suraiya Faroqhi, Cambridge, 2006, p. 275-276.

¹² D. Quataert, The Ottoman Empire, 1700-1922, second edition, Cambridge, p. 175-176.

¹³ Անդ, էջ 5: Բրուդը կարծում է, որ մինչ այդ (ԺԹ. դար՝ բարեփոխումների շրջան), միլլեթի՝ որպես «կրոնով սահմանված մարդիկ» բնորոշումը տրվել է ոչ միայն ոչ մուսուլմաններին, այլեւ առհասարակ բոլոր ազգերին: Դեռ ավելին՝ «միլլեթ» եզրույթն օգտագործվել է բնութագրելու համար մուսուլման համայնքները՝ ի հակադրություն զիմմիների: Փաստորեն՝ այն օգտագործվել է որպես «ունմայի», «խալամի ժողովուրդ»-ի հոմանիշ. տե՛ս B. Braude, Foundation myths of the Millet system, in: B. Braude, B. Lewis, էջ 70. S. Barbieri, նշվ. աշխ., էջ 4:

րերում եւ վարչական գրադրութեան մեջ այն հազվադեպ է օգտագործվել, այն էլ ընդհանուր առմամբ՝ ոչ մոսուլման մշակույթի եւ նշանավոր անձանց նկատմամբ հարգանք արտահայտելու համար¹⁴:

Կ. Պոլսի հայոց պատրիարքների իրավասությունները. Միլլեթներն անցել են ճանաչման աստիճանական ճանապարհ: Հրեա միլլեթը բնորոշվում է ապակենտրոնացված վարչական համակարգով եւ միայն ժԹ. դարի կեսերին է (1835 թ.) պաշտոնապես ճանաչվել Օսմանյան պետության կողմից՝ համաձայնելով՝ գլխավոր րաբբիի աստիճանով¹⁵: Այս մասին փաստում է նաեւ Մադաքիա արք. Օրմանյանը՝ նշելով, որ «հրեաները այն ատեն օրինաւորապէս եւ պաշտօնապէս ճանչցուած մարմին մը չէին կազմէր»¹⁶: Սակայն Հ. Սիրունին առարկում է՝ նկատելով, որ «տրամաբանօրէն անընդունելի է նախ որ ուրոյն կրօնքով եւ ուշագրաւ թիւով տարր մը, որպիսին էր հրեան, պաշտօնական կապ չունենար պետական շրջանակներուն հետ»¹⁷: Այնուամենայնիւ, հրեա միլլեթի ուսումնասիրութիւնը դուրս է սուլթան հոգւածի շրջանակից¹⁸:

Հուլյն-ուղղափառ միլլեթը ամենահինն էր եւ ճանաչվել էր 1454 թ.: Հուլյն միլլեթի կազմի մեջ էին մտնում կայսրութեան երկաթնակ բոլոր համայնքները կամ քաղկեդոնականները: Վերջիններս գտնվում էին հուլյն պատրիարքի իրավասութեան ներքո՝ միաժամանակ ունենալով իրենց ազգային-հոգեւոր առաջնորդը: Նույն սկզբունքով՝ կայսրութեան միաթնակ բոլոր համայնքները՝ ասորի հակոբիկյան, ղպտի եւ եթովպական, գրվեցին Կ. Պոլսի հայոց պատրիարքի իրավասութեան տակ¹⁹:

Հայկական միլլեթի կազմավորման սկիզբը համարվում է 1461 թ., այսինքն՝ Կ. Պոլսի հայոց պատրիարքութեան ստեղծման թվականը, երբ Սուլթան Մեհմեդ Բ.-ն (1444-1446, 1451-1481 թթ.), Կ. Պոլիս հրավիրելով Բուրսայի Հովակիմ եպիսկոպոսին, նրան շնորհել է պատրիարքի տիտղոս

¹⁴ S. Barbieri, նշվ. աշխ., էջ 5:

¹⁵ Այս մասին մանրամասն տես D. Stamatopoulos, From Millets to minorities in the 19th century Ottoman Empire: an ambiguous modernization, Pisa, 2006, p. 43, <http://www.clioheres.net/books/7/21.pdf> էջ 254-258. S. Sürgevil, Osmanlı İmparatorluğu'nda Yahudiler, Türkler, Cilt 10, Ankara, 2002 [s. 251-260], pdf. p. 461-470, էջ 462, <http://www.meliksah.edu.tr/msen/wp-content/uploads/2014/06/turkler-cilt-10.split-and-merged.pdf>.

¹⁶ Մ. արք. Օրմանյան, Հայոց Եկեղեցին, էջ 81. տես Յ. Սիրունի, Պոլիս եւ իր դերը, հ. 1, Պէյրուք, 1965, էջ 290:

¹⁷ Յ. Սիրունի, նշվ. աշխ., հ. 1, էջ 290:

¹⁸ Անդ, էջ 290-291:

¹⁹ A. Sanjian, The Armenian communities in Syria under Ottoman dominion, Cambridge, Massachusetts, 1965, էջ 32-33. տես Ի. Ortayli, նշվ. աշխ., էջ 396:

եւ կայսրութեան հայերի վրա հոգեւոր ու քաղաքական իշխանութիւնը²⁰: Պատրիարքի աթոռանիստը Սամաթիայի Ս. Գեւորգ եկեղեցին էր, իսկ 1641 թ. մինչ օրս՝ Գոմագափուի Ս. Աստվածածին եկեղեցին²¹:

Մինչ այսօր միանշանակ չեն ներկայացված Հովակիմ եպիսկոպոսի պատրիարք դառնալու հանգամանքները: Առաջին եւ միակ աղբյուրը Մ. Չամչյանի աշխատութիւնն է, որ հայտնում է Հովակիմի՝ Բուրսայի առաջնորդ լինելու եւ Մեհմեդ Բ. սուլթանի՝ նրան Կ. Պոլսի հայերի հոգեւոր առաջնորդ կարգելու մասին²²: Մ. Չամչյանից բացի՝ հայերեն կամ օտարալեզու որեւէ աղբյուր չի հիշատակում այդ մասին, ինչը, բնականաբար, կասկածի տեղիք է տալիս: Խնդիրն այն է, որ տվյալ ժամանակահատվածում հայերեն ձեռագրերի հիշատակարանները միաժամանակ Հովակիմ անունով մի քանի եպիսկոպոսների են վկայակոչում (1483 թ.՝ Բերիայում (Հալեպ) կամ Բերայում, 1439 թ.՝ Կ. Պոլսում, 1445 թ.՝ Կուտինա-Պրուսայի (Քյոթահյա-Բուրսա) շրջանում, 1469 թ.՝ Ֆիլիպեում), ուստի դժվար է միանշանակ ասել, թե նրանցից որն է հետագայում դարձել Կ. Պոլսի առաջին պատրիարքը²³:

Անկախ Հովակիմի՝ առաջին պատրիարք դառնալու, նրա անձի վերաբերյալ տարակարծութիւններից՝ անհերքելի փաստ է դեռեւս բյուզանդական գերիշխանութեան ժամանակներից Կ. Պոլսում հայերի մշտական ներկայութիւնը: Թուրքական ներխուժումից դարեր առաջ, ինչպէս վկայում են ժամանակի գրավոր հուշարձաններն ու հիշատակարանները, անկախ իրենց թվաքանակից՝ Կ. Պոլսի հայերը հանդես են եկել որպէս «էթնոկրոնական որոշակի միավոր»՝ իրենց առաջնորդ եպիսկոպոսի գլխավորութեամբ²⁴:

²⁰ A. Gündüz, İstanbul'un Osmanlılar Tarafından Fethi, Türk- İslam ve Avrupa Açısından Önemi, Karadeniz Araştırmaları, Cilt: 5, Sayı: 17, Bahar 2008 (s. 51-66), էջ 61. նաև՝ A. Sanjian, նշվ. աշխ., էջ 32. **Հ. Սիրունի**, Պոլիս և իր դերը, «Էջմիածին», 1963, Դ., էջ 29: Դժբախտաբար, այդ աթոռի հիմնման հանգամանքները լրիվ ծանոթ չեն մեզ, քանզի, ինչպես նշում է Մաղաքիա արք. Օրմանյանը, «Կոստանդնուպոլսոյ հայաբնակչութիւնը կամ լաւ եւս օսմանեան հպատակ հայութիւնը, իր յատուկ պատմագիրը չէ ունեցած, որ որոշակի ցուցներ մեզի՝ անոր առաջին ժամանակներուն հանգամանքները, եւ ստիպուած ենք կցկտոր ակնարկներով կազմել անոր նախնական պատմութիւնը, մինչեւ որ հասնինք այն ժամանակներուն, ուր գլխաւոր դիրք եւ կանոնութիւն ստացաւ ընդհանուր հայութեան հանդէպ». «Ազգապատում», մասն Բ., Բէյրութ, 1960, էջ 2186. տե՛ս **Յ. Սիրունի**, նշվ. աշխ., հ. 1, էջ 219-224:

²¹ **Հ. Սիրունի**, Պոլիս և իր դերը, «Էջմիածին», 1963, Դ., էջ 33-34, 39:

²² Անդ, էջ 29. Մ. Չամչյան, Պատմութիւն Հայոց, հ. Գ., Վենետիկ, 1786, էջ 500:

²³ **Հ. Սիրունի**, Պոլիս և իր դերը, «Էջմիածին», էջ 29-31:

²⁴ **Ա. Խառատյան**, Կոստանդնուպոլսի հայ գաղթօջախը, Երեւան, 2007, էջ 49-50. տե՛ս **Վ. Բայրության**, Օսմանյան կայսրության պատմություն, Երեւան, 2011, էջ 152:

Եվ այսպես՝ միլլեթների գլուխ կանգնած պատրիարքները, որպես իրենց կրոնաէթնիկական խմբի հոգեւոր առաջնորդ, դառնում էին իրենց ժողովրդի իրավական ներկայացուցիչը Օսմանյան պետության առջեւ: Այսինքն՝ նրանք «հոգեւոր գերակայության ձեւի մեջ իրականացնում էին աշխարհիկ քաղաքացիական գործառույթներ, որոնք պետք է համապատասխանեին օսմանյան կարգուկանոնին եւ ապահովեին հողային-ունտային հարաբերությունների մանրակերտը տվյալ համայնքում»²⁵:

Կ. Պոլսի հայոց պատրիարքների իրավասությունների ուսումնասիրությունը մեծ կարեւորություն ունի նախ եւ առաջ այն առումով, որ դրանց հիման վրա կարողանում ենք որոշակի պատկերացում կազմել տվյալ ժամանակահատվածում կայսրության հպատակ հայերի նկատմամբ օսմանյան իշխանությունների վարած քաղաքականության եւ դիրքորոշման մասին:

Հայոց պատրիարքների իրավասությունները եւ առհասարակ միլլեթների իրավական վիճակը լավագույնս արտացոլված են օսմանյան սուլթանների կողմից հայոց կաթողիկոսներին ու պատրիարքներին տրված ֆերմաններում (հրաման), կաթողիկոսական բերաթներում (արտոնագրեր): Այդ մասին Սիմեոն Երեւանցին գրում է. «Քանզի թեեւ տվողներն այլազգիներ են եւ մեր կրոնին՝ թշնամի, սակայն նրանց արարքներն ու հրամանագրերը մեր այս երկրի համար օգուտ տվող են, [ցավելով] բուժող եւ ապահովութիւն [բերող]: Ինչպես որ թունավոր օձերից ենք ակնկալում ստանալ թերիակե»²⁶, որպեսզի բուժենք զանազան հիվանդություններ»²⁷:

Ցավոք, մինչ այժմ պահպանված ֆերմաններից ամենահինը, որ մանրամասն տեղեկություններ է հաղորդում հայոց պատրիարքների պարտականությունների ու իրավասությունների մասին, ԺԸ. դարի է՝ Հիջրայի 1177 թ./ 1764 թ. հունիսի 3: Այն օսմանյան սուլթան Մուստաֆա Գ.-ի բերաթն է՝ տրված Կ. Պոլսի պատրիարք Գրիգոր Պասմաճյանին (1764-1773 թթ.): Հաշվի առնելով այն հանգամանքը, որ ֆերմանները հիմնականում կրկնում էին (նորոգում էին նախորդ հրամանների պայմանները եւ հաճախ հիշատակվում նման ֆերմաններ տված նախորդ սուլթանների կողմից) նախորդ բերաթների հիմնական կետերը, մեզ հասած առաջին օրինակը եւ հետագա ֆերմանները (այդ թվում նաեւ ՄՄ «Կաթողիկոսական

²⁵ Ա. Խառատյան, նշվ. աշխ., էջ 156:

²⁶ Դեղ:

²⁷ Սիմեոն Երեւանցի, Զամբո, Երևան, 2003, էջ 329:

դիվան»-ում պահվող) համեմատելով՝ կարելի է վեր հանել Կ. Պոլսի հայոց պատրիարքների իրավասությունները: Ֆերմանի հիմնական կետերն են.

1. Պատրիարքը, պաշտոնին անցնելով, պետք է 100.000 ալկէ վճարեր արքունական գանձարան՝ իբրեւ փեշքեշ²⁸:

Հայտնի է, որ Կ. Պոլսի հայոց պատրիարքներն այդ պաշտոնին հաստատվելու կամ ցանկացած որոշում եւ առաջարկ հաստատող ֆերման ձեռք բերելու համար պարտավոր էին տարեկան սահմանված տուրք վճարել արքունական գանձարան: Այդ մասին մանրամասն տեղեկություն հայտնում է Ժ. Դարի ժամանակագիր Ղ. Ինճիճյանը: Հայոց պատրիարքը պետք է վճարեր սահմանված տարեկան 100.000 ալկէ՝ «ի գանձն արքունի» (*hazîne-i hâssa*) եւ 140.000 ալկէ, որ տալիս էր դեֆթերդարին: Ներառյալ «բահչիլը», որ տալիս էր այլ պաշտոնյաներին, կազմում է 1.244 ղուրուզ գումար: Պատրիարքը նաեւ պետք է վճարեր նորանշանակ վեզիրին՝ 500 ղուրուզ, «վեզիր քեահեասին» (տնտեսական գործերով վերակացու՝ *sadaret kethüdası*)՝ 250 ղուրուզ, 200 ղուրուզ՝ չավուզ բաշիին (*çavuşbaşı*)²⁹, կերպաս հանդերձներ՝ որպես ընծա, 40 ղուրուզ՝ այլ ծախսեր (*muhtelif eşhâs*)³⁰: Իսկ պատրիարքն իրեն ենթակա յուրաքանչյուր առաջնորդությունից տարեկան առնում էր 600 ղուրուզ, 200՝ Անկարայից, Թոքատից, Դիարբեքիրից, Ուրֆայից, Սիվասից, Տրապիզոնից եւ Գյուլյումշանեից, անատոլիական մասից՝ բացի Իզմիրից եւ Արաբկիրից, նաեւ նրանցից, որոնք էջմիածնի թեմերն են, Ռումելիի³¹ մասից՝ բացի Ադրիանեից (*Edirne*), Թեբրեզադից³²:

2. Կ. Պոլսի պատրիարքի իրավասությունը տարածվում էր կայսրության Ռումելիի եւ Անատոլիայի շրջաններում բնակվող համայն հայության վրա: Այդ շրջանների թեմական առաջնորդները, քահանաներն իրենց հոգեւոր ծառայության համար նրան պետք է դիմեին: Ոչ ոք չպետք

²⁸ Փեշքեշ=փիշքեշ՝ ընծա, պատարագ, պարգև. տե՛ս Ի. Յակովրոս, Վ. Պոզանեան, Համառոտ բառարան ի տաճիկական է ի հայ, հ. Բ., Վիեննա, 1841, էջ 955:

²⁹ Չավուզ բաշի՝ չավուշների պետ, համարժեք է փաշային. տե՛ս Ա. Սաֆրաստյան, Թուրքական աղբյուրները Հայաստանի, հայերի եւ Անդրկովկասի մյուս ժողովուրդների մասին, հ. Ա., Երևան, 1964, էջ 374:

³⁰ Ղ. Ինճիճեան, Աշխարհագրություն չորից մասանց աշխարհի, հ. Ե., ի Վենետիկ, 1804, էջ 117. տե՛ս “The Patriarch and the Sultan: the struggle for authority and the quest for order in the eighteenth-century Ottoman Empire”, A Ph. D. Dissertation by E. Tellan, Department of History İhsan Doğramacı Bilkent University Ankara, June 2011, էջ 167-168:

³¹ Օսմանյան կայսրության եվրոպական մասը՝ ներկայիս Բալկանները կամ Բալկանյան թերակղզին: Կայսրության ողջ տարածքը բաժանված էր երկու հիմնական մասերի՝ եվրոպական՝ Ռումելի եւ ասիական՝ Անատոլի (Անատոլիա):

³² Ղ. Ինճիճեան, նշվ. աշխ., էջ 117. տե՛ս E. Tellan, նշվ. աշխ., էջ 167-168:

է արգելք հանդիսանար պատրիարքութեան ենթակա շրջաններում առաջնորդ ընտրելիս, վարդապետ եւ քահանա ձեռնադրելիս կամ պաշտոնանկ անելիս: Առանց պատրիարքի կնքած գրութեան՝ որեւէ մեկը առաջնորդական պաշտոն չէր կարող ստանձնել:

Վերը նշված թեմերի առաջնորդները տվյալ ժամանակաշրջանում համարվում էին պատրիարքի փոխանորդները՝ մուրախխասները (պատվիրակ կամ փոխանորդ)³³: Վերջիններս հանդես էին գալիս որպես տեղական միլլեթբաշիներ, որոնցից յուրաքանչյուրը պատասխանատու էր իր հատվածի ժողովրդի հարկային-ֆինանսական եւ իրավական (կտակ, պսակ, ամուսնություն, գույքային հարաբերություններ) պարտականությունների եւ իրավունքների իրացման համար³⁴:

3. Վակֆերի³⁵ վերաբերյալ խնդիրները պատրիարքի իրավասությունն էին պատկանում:

4. Անժառանգ կղերի թողած գույքը պետք է անարգել տնօրիներ պատրիարքը՝ առանց արքունական գանձարանի ու շարիա դատարանի պաշտոնյաների միջամտության:

5. Չէին արգելվում հայերի ծիսակատարությունները հնուց ի վեր նրանց պատկանող եկեղեցիներում, վանքերում եւ ուխտատեղիներում, ինչպես նաեւ արգելքներ չէին դրվում վերջիններիս նորոգության ժամանակ:

Օսմանյան սուլթանների կողմից Կ. Պոլսի հայոց պատրիարքներին տրված տարաբնույթ ֆերմանների կարեւորագույն կետերից են կայսրությունից քանդված եւ վերանորոգման կարիք ունեցող հայկական բոլոր եկեղեցիների ու վանքերի վերանորոգումը թույլատրելու, այդ ընթացքում որեւէ խոչընդոտ չհարուցելու վերաբերյալ որոշումները³⁶: Մատենադարանի արխիվային ֆոնդի կաթողիկոսական դիվանում այդ մասին փաստող բազմաթիվ հրովարտական եւ պահվում: Դրանցում հիմնականում տվյալ սուլթանը նորոգում է (ամենայն մանրամասնությամբ նշում է իրեն

³³ Մ. արք. Օրամանեան, Ազգապատում, մասն Բ., էջ 2187-2188. Յ. Սիրունի, նշվ. աշխ., հ. 1, էջ 282:

³⁴ Ա. Խառատյան, նշվ. աշխ., էջ 156:

³⁵ Անստարելի սեփականություն. ըստ իսլամական իրավագիտության՝ նվիրատվության պահին դադարում է լինել նվիրատուի սեփականությունը, բայց նաեւ չի դառնում սուսցողի սեփականությունը, քանի որ առքուվաճառք չի արվել:

³⁶ Այստեղ հարկ է նշել, որ իսլամական օրենքի համաձայն՝ ոչ-մուսուլմանները չէին կարող կառուցել նոր եկեղեցիներ կամ սինագոգեր, այլ միայն վերանորոգել հները: Եկեղեցիների կառուցումը հնարավոր էր միայն պետական հատուկ քաղաքականության շրջանակներում. այս մասին տե՛ս F. Öztürk, նշվ. աշխ., էջ 78. Հ. Սիրունի, Պոլիս եւ իր դերը, «Էջմիածին», էջ 33:

նախորդած սուլթանների անուանները, որոնք նման ֆերմաններ են արձակել) Կ. Պոլսի հայոց պատրիարքներին տրված ֆերմանը, որով հրաման էր տրվում նալիբներին չխոչընդոտել եկեղեցիների վերանորոգումը կամ ավերված եկեղեցիների տեղերում նորերի կառուցումը³⁷:

6. Որեւէ քահանա չպետք է պսակ կատարեր առանց պատրիարքի հավանության եւ եկեղեցական ծեսի պահանջներին հակառակ: Երբ հայ կիճն իր ամուսնուց փախչեր կամ ամուսինը ցանկանար նրանից բաժանվել, պատրիարքից բացի ոչ ոք չպետք է միջամտեր:

Պետք է նշել, սակայն, որ հիմնականում ընտանեկան հարաբերությունների պարզաբանման համար ոչ մուսուլմաններն իրավունք ունեին ընտրելու կա՛մ միլլեթ դատարանը, կա՛մ շարիա դատարանը: Վերջին դեպքում մուսուլման դատավորի վճիռները հիմնվում էին իսլամական իրավունքի վրա: Բնականաբար, ոչ մուսուլման կրոնական առաջնորդները փորձում էին արգելք հանդիսանալ այն մարդկանց համար, որոնք դիմում էին շարիա դատարանին, եւ նրանց նկատմամբ կիրառում էին պատժամիջոցներ. այնուամենայնիվ, ոչ մուսուլմանները հաճախ էին դիմում շարիա դատարանին³⁸: Եթե կողմերից մեկը մուսուլման էր, կամ ոչ մուսուլմանը գործել էր քրեական հանցանք, ապա գործը պարտադիր պետք է քննվեր շարիա դատարանում³⁹: Հետաքրքիր է, որ շարիա դատարանին հիմնականում դիմում էին ոչ մուսուլման կանայք՝ ամուսնալուծությունների դեպքում, երբ սեփական համայնքի դատարանը չէր կարող ամուսնալուծել կամ դրանից հետո ֆինանսական փոխհատուցում չէր տալիս, ինչը, սակայն, պարտադիր էր իսլամական օրենքով:

Այս երեւույթն այնքան տարածված էր, որ Հալեպ քաղաքի շարիա դատարանների (թվով 5) արձանագրությունների ուսումնասիրությունից հետո որոշ պատմաբաններ կասկածի տակ են դնում օսմանյան մի շարք շրջաններում միլլեթ դատարանների գոյություն փաստն առհասարակ⁴⁰:

³⁷ ՄՄ «Կաթողիկոսական դիվան», թղթ. 3, վավ. 59, օսմաներեն. այս վավերագիրը սուլթան Մեհմեդի հրովարտակն է (1809 թ. /1224/) կայսրության բոլոր գավառների, նահանգների իշխանություններին: Ի պատասխան Կ. Պոլսի Հովհաննես պատրիարքի խնդրանքին՝ սուլթանը հրամայում է թույլատրել եւ խոչընդոտներ չհարուցել քանդված եւ վերանորոգման կարիք ունեցող եկեղեցիների ու վանքերի վերանորոգման ժամանակ: Նույն բովանդակությամբ ֆերմանի օրինակ տես Գ. քիւյ. Աղանեսնց, Դիան Հայոց պատմութեան, գիրք Ժ., Մանր մատենագիրք, ԺԵ.-ԺԹ. դար, Թիֆլիս, 1912, էջ 247-256:

³⁸ F. Öztürk, սշվ. աշխ., էջ 80:

³⁹ Անդ, էջ 80-81:

⁴⁰ A. Cohen, On the realities of the Millet system: Jerusalem in the sixteenth century, էջ 15. Է. Սևանքեան, սշվ. աշխ., էջ 258:

7. Շարիայի (դատարան) հետ առնչություն ունեցող հայերի դատերը պետք է ուղղարկվեն Կայսերական դիվան (Dîvân-ı Hümayun):

Պետական իշխանությունը կարող էր չհղյալ համարել համայնքային, ինչպես նաև շարիա դատարանների վճիռները:

8. Պատրիարքը պետք է տեր լիներ եկեղեցիներին պատկանող այգիներին, պարտեզներին, ագարակներին, խանութներին, ջրաղացներին, շենքերին, կարասիներին եւ այլն:

9. Ճամփորդության ժամանակ իշխանության ներկայացուցիչներից ոչ ոք պահանջներ չպետք է ներկայացներ պատրիարքի եւ նրան ուղեկցողների հանդերձանքի, ձիերի եւ այլնի վերաբերյալ:

10. Չպետք է խոչընդոտեր պատրիարքին պատկանող այգիների բերքի կամ հավատացյալների կողմից իբրեւ նպաստ մատուցված սննդի տեղափոխմանը:

11. Որեւէ քրիստոնյա (հայ) իր կամքին հակառակ չպետք է դավանափոխվեր:

12. Պատրիարքն ու նրա հետեւորդներից 15 եկեղեցականներ ազատվում էին ջրգյալից (գլխահարկ), ավարիզից⁴¹ եւ թեքիալիֆ-ի էորֆիեից⁴²:

13. Որեւէ իշխանավոր իրավունք չուներ վերցնելու ճամբարիտ (ուղղափառ) հայ ռայաներին պատկանող եկեղեցիներն ու վանքերը, դրանք տալ ուրիշ դավանանքի պատկանող կամ «կաթոլիկ կոչված խռովարարներին»:

14. Եկեղեցիների գույքից մաքսատուրք եւ անցատուրք չպետք է գանձվեր⁴³:

Ահա սրանք էին այն հիմնական կետերը, որոնք, ժամանակի պահանջներին համապատասխան, որոշակի փոփոխություններ են կրել, սակայն հիմնականում պահպանվել են օսմանյան սուլթանների կողմից Կ. Պոլսի հայոց պատրիարքներին տրված գրեթե բոլոր ֆերմաններում:

⁴¹ Օսմանյան կայսրության հարկատեսակ (օսմաներեն՝ արկած, դժբախտություն), որը սկզբում հավաքվում էր պատերազմների ժամանակ՝ անդամների տեսքով կամ փոխհատուցվում էր աշխատանքով: Հետագայում այն սկսեց մշտական բնույթ կրել եւ գանձվել դրամով. տե՛ս Լ. Վարդան, Հարկերը Օսմանեան եւ Պարսկական կայսրություններում մեջ, ԺԵ. Ի. դար, Երևան, 2004, էջ 79-87:

⁴² Ընդհանուր անվանումն է (թեքիալիֆ՝ բեռ, ծանրություն, էորֆիե՝ սովորության համաձայն) բազմաթիվ հարկերի (99 կամ ավել), որոնք գանձվում էին ըստ ժամանակի կամ պայմանների պահանջի կամ տվյալ միապետի կամայականությամբ. այս մասին մանրամասն տե՛ս Լ. Վարդան, նշվ. աշխ., էջ 404-410:

⁴³ Յ. Սիրունի, նշվ. աշխ., հ. 1, էջ 282-284. այս ֆերմանի, ինչպես նաև Կ. Պոլսի հայոց պատրիարքների իրավասությունների մասին տե՛ս Ա. Խառատյան, նշվ. աշխ., էջ 134-140:

Կ. Պոլսի Հայոց պատրիարքի իրավասությունները տարածվում էին նաեւ Սսի եւ Աղթամարի կաթողիկոսությունների, Երուսաղեմի պատրիարքության վրա⁴⁴:

Հայտնի է, որ Հալեպի, Անտիոքի, Բեյլանի եւ Հյուսիսային Սիրիայի Հայկական թեմերը գտնվում էին Սսի կաթողիկոսի, իսկ Լաթաքիայի, Դամասկոսի եւ Բեյրութի համայնքերը՝ Երուսաղեմի պատրիարքի իրավասության ներքո⁴⁵: Սակայն, ինչպես արդեն նշել ենք, դա են վկայում նաեւ օսմանյան սուլթանների՝ Հայոց պատրիարքներին տված ֆերմանները. վերջիններիս իրավասությունները տվյալ ժամանակաշրջանում տարածվում էին կայսրության համայն Հայության վրա: Հետեւաբար՝ Սսի, Աղթամարի կաթողիկոսություններն ու Երուսաղեմի պատրիարքությունը, պահպանելով մինչ այդ հաստատված ներեկեղեցական բաժանումները, այնուամենայնիվ, մտնում էին Կ. Պոլսի Հայոց պատրիարքների ենթակայության ներքո: Այդ մասին է փաստում ՄՄ արխիվային փաստաթղթերի՝ «Կաթողիկոսական դիվան»-ի թ. 258-րդ թղթապանակի Հմր. 31-րդ վավերագիրը: Այն Կիլիկիայի կաթողիկոս Եփրեմ Սսեցու՝ 1782 թ. թվագրված գրությունն է՝ ուղղված Զաքարիա (Զաքարիա Փոքուզյան Կաղզվանցի՝ 1773-1781, 1782-1799 թթ.) պատրիարքին. Եփրեմ Սսեցին աղբյուրագին խնդրում է սրբազանին՝ սուլթանից ֆերման ձեռք բերել՝ Բերիայի հայոց թեմին առաջնորդ նշանակելու համար: Կաթողիկոսը նշում է, որ այս հարցը կարող է լուծել նաեւ եկեղեցական ժողովը, սակայն այն դեպքում, երբ առաջնորդը «բռնավորների դուռը գնա», ստիպված կլինի տուգանք վճարել, ինչպես որ սահմանված է⁴⁶:

Ինչ վերաբերում է Երուսաղեմի պատրիարքությանը, ապա պետք է նշել, որ օսմանյան տիրապետության 400 տարվա ընթացքում Հայ եկեղեցին շարունակեց մնալ որպես տեղի երեք հիմնական եկեղեցիներից (Հուլյն ուղղափառի եւ Լատին կաթոլիկի հետ միասին) մեկը⁴⁷: Երուսաղեմի հա-

⁴⁴ A. Sanjian, նշվ. աշխ., էջ 33. տե՛ս Մ. արք. Օրմանեան, Ազգապատում, մասն Բ., էջ 2156-2157: Կ. Պոլսի պատրիարքությանը ենթակա թեմերի մասին տե՛ս Յ. Սիրունի, նշվ. աշխ., հ. 1, էջ 292-306. Մ. արք. Օրմանեան, Հայոց եկեղեցին, էջ 6. Վ. Միքայելյան, Հայ գաղթաշխարհի պատմություն, հ. 2, Երևան, 2003, էջ 97-102:

⁴⁵ Վ. Միքայելյան, նշվ. աշխ., էջ 332:

⁴⁶ «Կաթողիկոսական դիվան», թղթ. 258, վավերագիր 31: Վավերագրում Կիլիկիայի կաթողիկոսը խնդրում է նաև կարգադրել իրենց գրատան վարիչին, որ թույլ տա ձեռագրերից արտագրել Ներսես Լամբրոնացու, Հակոբ Ասուլածաբանի եւ Վարդան Բարձրաբերդցու գրվածքներից:

⁴⁷ S. Kuruvilla, The Palestinian Christian Church in Jerusalem: an interplay of history and nationalism in the Palestinian struggle for independence, https://www.academia.edu/4544018/The_Palestinian_Christian_Church_in_Jerusalem, p. 6.

յոց պատրիարքի իշխանությունը նաեւ քաղաքական բնույթ էր կրում եւ տարածվում էր միաբնակ համայնքների վրա⁴⁸: Դա է վկայում նաեւ ՄՄ արխիվային բաժնում պահվող Հմր. 160 օսմաններն վավերագիրը⁴⁹: Այն Մահմուդ Բ.-ի (1808-1839 թթ.) կողմից Երուսաղեմի Գաբրիել Նիկոմիտացի պատրիարքին (1818-1840 թթ.) տրված երաշխավորագիրն է: Այդ փաստաթուղթը վերահաստատում է ղպտի, հաբեշ, ասորի համայնքների նկատմամբ Երուսաղեմի հայոց պատրիարքի իրավասությունները, որոնք դեռեւս 1517 թ. տվել էր սուլթան Սելիմը Ա.-ն (1512-1520 թթ.)՝ Երուսաղեմի նվաճումից հետո: Նշվում է նաեւ, որ Սելիմ Ա.-ից առաջ նմանօրինակ ֆերմաններ Երուսաղեմի հայերին տվել են Օմար, Ալի խալիֆաները⁵⁰, Սալահ ադ-Դինը, իսկ օսմանյան տիրակալներից՝ նաեւ սուլթան Սուլեյման եւ սուլթան Մեհմեդ խաները: 1246 թ. Զուլ-Կադա ամսի 26-ին (1831 թ. մայիսի 9) Մահմուդ Բ. Ղազրի ժամանակ վերահաստատվում են Սելիմի Ա.-ի՝ Հայոց պատրիարքությունը տված արտոնությունները:

Ընդհանրապես, հարկ է նշել, որ հայանպաստ ֆերմանների մեծ մասը վերագրվում են Մահմուդ Բ.-ին:

Մատենադարանի Կաթողիկոսական դիվանի 258-րդ թղթապանակի 61-րդ վավերագիրը Մահմուդ Բ.-ի կողմից Կ. Պոլսի պատրիարք Գրիգոր Խամսեցու (1801-1802, 1802-1813 թթ.) գրագիր Մանուկ դպիրի գրությունն է՝ հասցեագրված Դանիել կաթողիկոսին (Դանիել Ա. Սուրմառեցի՝ 1807-1808 թթ.): Գրագիրը, ներկայացնելով Մուստաֆա Բայրակտար փաշայի կողմից սուլթանի պալատ ներխուժելը, Մուստաֆա Դ.-ին գահընկեց անելն ու Մահմուդ Բ.-ին գահին նստեցնելը, նշում է, որ վերջինս հույներից վերցնում եւ հայերին է վերադարձնում Ս. Հակոբի վանքը⁵¹:

Մեկ այլ ֆերմանով, որը տրվել էր ի պատասխան Կ. Պոլսի Հովհաննես Թ. Կոլոտ Բաղիշեցի պատրիարքի (1715-1741 թթ.) խնդրանքի, Հիջրայի 1140 թ. /1727 թ. սուլթան Ահմադ Գ.-ն (1703-1730 թթ.) երկրի բոլոր ղազիններին, նայիրներին, նահանգապետներին արգելում է Երուսաղեմ ուխտի գնացողներից որեւէ հարկ պահանջել⁵²:

⁴⁸ D. Tsimhoni, The Armenians and the Syrians: ethno-religious communities in Jerusalem, Middle Eastern Studies, 1984, vol. 20, N 3, Jul., p. 352.

⁴⁹ «Կաթողիկոսական դիվան», թղթ. 3, վավ. 160, օսմ.:

⁵⁰ Տե՛ս Վ. Մակարյան, Ալի իբն Աբու Թալիբի՝ քրիստոնյաներին տրված երաշխավորագիրը, Լեւոն Խաչիկյան, 90. Նյութեր Մատենադարանի հիմնադիր տնօրենի ծննդյան ինստիտուտական նվիրված միջազգային գիտաժողովի, 2010:

⁵¹ Յ. Սիրունի, Պոլիս եւ իր դերը, հ. 2, Պէյրոյթ, 1969, էջ 50-55, 62-63:

⁵² «Կաթողիկոսական դիվան», թղթ. 3, վավ. 32 (օսմաներեն):

Հայոց պատրիարքների ունեցած հեղինակությունն մասին է վկայում նաեւ մանկահավաքի (Դեւչիրմե⁵³) վերաբերյալ մի տեղեկություն: Ըստ հայկական աղբյուրների⁵⁴ Բարձր Հայքի հայաշատ գավառներում անցկացվող մանկահավաքը Մաղաքիա Դերձանցի վարդապետը համարում էր անմարդկային եւ սարսափելի: Մաղաքիան արդեն ծերացել էր, սակայն անձամբ է գալիս Կ. Պոլիս՝ իր նախկին աշակերտ, պատրիարք Աստվածատուր Եաղուպյան եպիսկոպոսի մոտ (1537-1550 թթ.): Մաղաքիա վարդապետը, մեծ ջանքեր գործադրելով, կայսերական արտոնություն է ստանում Դերձանում, Բաբերդում եւ հայաբնակ որոշ վայրերում մանկահավաքը դադարեցնելու վերաբերյալ: Այդ ձեռնարկը հաջողություն է պսակվել 1545 թ., եւ դրա օրինակը քաջալերիչ է եղել մյուս գավառների համար: Այդպես՝ հատուկ դիմումներով եւ այլ միջոցներով արտոնություններ են ստացել, որի հետեւանքով մանկահավաքը հետզհետե դադարել է:

ԺԸ. դարի առաջին կեսից սկսյալ՝ Կ. Պոլսի հայոց պատրիարքների իրավական վիճակը փոխվում է. միլլեթների հոգեւոր եւ քաղաքացիական գործերի կառավարման հարցում կարեւոր դեր են սկսում խաղալ հայ մեծահարուստները (պաշտոնյաներ, լուծայափոխներ), որոնց դարակեսից կոչում էին ամիրաներ⁵⁵: Հայ ամիրաների դերքերն առավել ամրապնդվեցին ԺԹ. դարում՝ կապված կայսրության ներքին քաղաքական փոփոխությունների հետ. վերջիններս պայմանավորված էին դարասկզբին արտաքին քաղաքականության ոլորտում օսմանյան իշխանությունների կրած անհաջողություններով:

1804 թ. սերբական, ապա՝ 1821 թ. հունական ապստամբությունների հետեւանքով Օսմանյան կայսրությունից անջատվեցին եվրոպական տարածքները: Հունական հեղափոխությունը բեկումնային դարձավ նաեւ միլլեթների շրջանում լուրջ փոփոխությունների համար: Հունական միլլեթը քաղաքական հարթակում մինչ այդ զբաղեցրած իր գերակա դիրքը

⁵³ Մ. Զուլայյան, Դեւչիրմեն (մանկահավաք) Օսմանյան կայսրությունում ըստ թուրքական եւ հայկական աղբյուրների, ՊԲՀ, 1959, թ. 2-3, էջ 247-256. Ա. Շաքարյան, Բոնագաղթն ու մանկահավաքը որպես Օսմանյան կայսրությունում ժողովրդագրական վերադասավորման միջոցներ, Մերձավոր Արեւելք II, Երեւան, 2005, էջ 59-62, «Օսմանյան կայսրության բնակչության խուսափումը դեւչիրմենից», Մերձավոր Արեւելք III, Երեւան, 2006, էջ 29-33:

⁵⁴ Ղ. Իսնիճեւան, նշվ. աշխ., էջ 63-64. Մ. արք. Օրամանեան, Ազգապատում, մասն Բ., էջ 2237-2238:

⁵⁵ D. Stamatopoulos, նշվ. աշխ., էջ 263. տե՛ս E. Hartmann: The “Loyal nation” and its deputies. The Armenians in the first Ottoman Parliament, in: Ch. Herzog, M. Sharif (eds.), The first Ottoman experiment in democracy, Würzburg, 2010, p. 187-222, էջ 201:

զիջեց հայերին, որոնց օսմանյան իշխանությունները համարում էին «հավատարիմ համաերկրացի» (*sadik yurttaş*), «հավատարիմ հպատակ» (*tebea-i sadika*) եւ «հավատարիմ միլլեթ» (*millet-i sadika*)⁵⁶:

ԺԹ. դարի առաջին տասնամյակներում հայ լուսնայափոխները՝ սարքաֆները, համագործակցելով մոսկովյան պաշտոնյաների հետ, ձեռք բերեցին մեծ ազդեցություն⁵⁷: Հայ ամիրաները հոգում էին պատրիարքության, եկեղեցական եւ ազգային հաստատությունների ծախսերը, որը նրանց իրավունք էր տալիս իրենց կամքը թելադրել միլլեթին: Ամիրաները հետզհետե դարձան ավելի զորեղ, քան պաշտոնապես ճանաչված պատրիարքը, ուստի արդեն իրենք էին առաջադրում⁵⁸: Հայ աղայական դասը դարձավ թե՛ Սսի կաթողիկոսների եւ թե՛ Երուսաղեմի պատրիարքների, թեմական առաջնորդների եւ վեքիլ վարդապետների հենարանը, որոնց առաջադրում ու նշանակում էին հայ ամիրաները՝ վայելելով նահանգային վարչության եւ այլ իշխանավորների հովանավորություն⁵⁹: Հ. Սիրունին նշում է, որ ամիրայական մի քանի տներ, հատուկ բերաթնների շնորհիվ, ազատված էին որոշ տուրքերից⁶⁰:

ԺԹ. դարասկզբին Մահմուդ Բ.-ն (1808-1839 թթ.) արագացրեց Սելիմ Գ.-ի (1789-1807 թթ.) սկսած «ավանդական բարեփոխումները», որոնք երկիրը տանում էին դեպի արեւմտականացում, միտված էին բարելավելու վարչական կառավարման համակարգը եւ կասեցնելու քրիստոնյա հպատակների ազգային-ազատագրական շարժումների ընդլայնումը⁶¹:

⁵⁶ Z. Kazici, Osmanlılarda Hoşgörü, Türkler, Cilt 10, Ankara, 2002 [s. 221-232], էջ 417, <http://www.meliksah.edu.tr/msen/wp-content/uploads/2014/06/turkler-cilt-10.splitted-and-merged.pdf>.

⁵⁷ D. Stamatopoulos, նշվ. աշխ., էջ 257:

⁵⁸ A. Sanjian, նշվ. աշխ., էջ 36: Աղայական դասը եկավ փոխարինելու Կ. Պոլսի, այսպես կոչված, «Ալթը ջեմաաթ»-ին (վեց համայնքներ): Այդ վեց համայնքների հայությանը, որը կազմում էր պոլսահայության կորիզը, բնակեցրել էր սուլթան Մեհմեդ Բ. Ֆաթիհը: Պոլսահայ համայնքը պետության առջեւ ներկայացնում էին այդ համայնքների երեւելիները: Վերջիններիս հաճությամբ էր նաեւ ընտրվում նոր պատրիարքը: «Ալթը ջեմաաթ»-ի կողքին ժամանակի ընթացքում հայտնվեց «Օխտը օղալար»-ը՝ Կ. Պոլսի հայկական յոթ բնակավայրը: Նրանց թիվը հետագայում ավելացավ, սակայն «Օխտը օղալար» եզրը մնաց գործածության մեջ: Այս երեւույթը տարածում է գտել նաեւ կայսրության հայաբնակ այլ նահանգներում. տե՛ս Յ. Սիրունի, Պոլիս եւ իր դերը, հ. 1, էջ 195-198:

⁵⁹ Վ. Միքայելյան, նշվ. աշխ., էջ 332. տե՛ս Մ. արք. Օրմանեան, Հայոց Եկեղեցին, էջ 94, 142-144:

⁶⁰ Յ. Սիրունի, Պոլիս եւ իր դերը, հ. 2, էջ 89-90:

⁶¹ U. Makdisi, Ottoman Orientalism, The American Historical Review, 2002, vol. 107, N 3, June, էջ 768-796. տե՛ս Ռ. Սաֆրաստյան, Օսմանյան կայսրություն. ցեղասպանության ծրագրի ծագումնաբանությունը (1876-1920), Երևան, 2009, էջ 44-54:

Սակայն դա հակառակ արդյունք ունեցավ՝ հանգեցնելով միլլեթներին՝ կրոնական խմբերից համայնքների վերածմանը եւ ազգային շարժումների ծավալմանը⁶²:

Այդ բարեփոխումները, որոնք հայտնի են «Թանգիմաթ» անունով, չչրջանցեցին նաեւ միլլեթի համակարգը. 1839 թ. նոյեմբերի 3-ին «Գլուկ-հանեի Հաթիթը» շերիֆով հայտարարվում էր բոլոր հպատակների (անկախ կրոնական եւ ազգային պատկանելությունից) անձի, պատվի եւ գույքի անձեռնմխելիություն⁶³: Ոչ մոլսուլմանները ողջունեցին, իսկ կայսրություն մոլսուլմանները դժգոհություն բնութագրեցին այն, քանի որ այդ հռչակագրի բազմաթիվ դրույթներ հակասում էին մոլսուլմանական ավանդույթներին եւ շարիային: Իսկ 1856 թ. փետրվարի 18-ի «Հաթիթ հումայունը» (Թանգիմաթի երկրորդ շրջան՝ ԺԺ. դարի 50-ական թթ. կեսերից մինչեւ 70-ական թթ. սկիզբ) լրացուցիչ արտոնություններ էր նախատեսում միլլեթների համար եւ միտված էր կայսրության բոլոր հպատակների միջեւ համեմատական հավասարություն ապահովելուն (պետական ծառայություն անցնելու, զինվորական կամ քաղաքացիական ցանկացած վարժարան ընդունվելու իրավունք եւ այլն)⁶⁴: Այս հռչակագիրը եւս բացասական արձագանք գտավ մոլսուլման հասարակության կողմից եւ կայսրության շատ վայրերում անգամ չհրապարակվեց:

Օգտվելով Թանգիմաթի առաջին շրջանում տրված արտոնություններից՝ 1844 թ. Մատթեոս պատրիարքի (1844-1848 թթ.) արտոնագրով ստեղծվեց պոլսահայերի ներքին գործերը կարգավորող մարմին՝ Ազգային ժողով՝ կազմված 30 անդամներից՝ 16 ամիրա եւ 14 համքար⁶⁵: Ազգային ժողովին էր վերապահվում պատրիարքարանի միջոցների ծախսերի հսկումը, դպրոցների բացման արտոնությունը, հայ համայնքի հարկահավաքությունը⁶⁶: 1847 թ. Կ. Պոլսի հայ համայնքի ներկայացուցիչները Թուլյուկություն ստացան ձեւավորելու երկու խորհուրդ՝ Հոգեւոր՝ 14 եւ Քաղաքացիական՝ 20 անդամներից բաղկացած⁶⁷:

⁶² Stéu E. Hartmann, նշվ. աշխ., էջ 21. S. Barbieri, նշվ. աշխ., էջ 7:

⁶³ Գ. Թանանյան, Ազգային սահմանադրությունիւ հայոց, <http://www.parliament.am/library/sahmanadrakan%20barepoxumner/Tananyan.pdf>, էջ 7: Հոչակազրնրի բովանդակության մասին մանրամասն տնւ F. Öztürk, նշվ. աշխ., էջ 82. Ռ. Սաֆրասոյան, նշվ. աշխ., էջ 47-48:

⁶⁴ Գ. Թանանյան, նշվ. աշխ., էջ 7-8:

⁶⁵ Անդ, էջ 9:

⁶⁶ Անդ:

⁶⁷ U. Masayuki, The First Draft of the Armenian Millet Constitution, Annals of Japan Association for Middle East Studies, 2007, vol. 23, N 1, էջ 214:

Բարեփոխումների երկրորդ շրջանում՝ 1856 թ., օսմանյան իշխանությունների թուլլտվությունը յուրաքանչյուր միլլեթ կազմեց եւ ներկայացրեց Ազգային սահմանադրության նախագիծ⁶⁸: 1857 եւ 1860 թթ. Հայկական միլլեթի ներկայացրած նախագծերը հավանության չարժանացան օսմանյան կառավարության կողմից, եւ միայն 1863 թ. մարտի 17-ին ընդունվեց «Ազգային սահմանադրություն հայոց»-ը («Nizâmnâme-i Millet-i Ermeniyân»)⁶⁹: Այն բաղկացած էր 5 գլխից եւ 99 հոդվածից, որոնք վերաբերում էին Հայկական միլլեթի բոլոր ենթահամակարգերին՝ Կ. Պոլսի հայոց պատրիարքարանին, Հոգեւոր եւ Քաղաքացիական խորհուրդներին (իր հանձնաժողովներով՝ կրթական, ինստիտուցիոնալ, դատական, վանական, ֆինանսական, կտակային, հիվանդանոցային), թաղային հանձնաժողովներին, Գլխավոր ասամբլեային, միլլեթի շրջանային վարչակազմին, ինչպես նաեւ այդ ենթահամակարգերում ընդգրկված պաշտոնյաների ընտրությունը, պարտականություններին, համայնքի հարկահավաքությունը⁷⁰:

Իսկ ահա 1876 թ. Օսմանյան կայսրության սահմանադրության (Kânûn-i Esâsî) 7-րդ հոդվածով կայսրության բոլոր հպատակները կոչվում էին օսմանցի՝ առանց խտրականության եւ անկախ դավանանքից, իսկ օսմանցու կարգավիճակ էին ստանում կամ կորցնում ըստ օրենքով հստակ սահմանված պայմանների⁷¹:

1876 թ. սահմանադրության ընդունմամբ՝ կայսրության ոչ մուսուլմանների առջեւ բացվեցին նաեւ օսմանյան պետական ապարատի դռները: Հայերը կառավարությունում զբաղեցրին պատգամավորական աթոռներ⁷² եւ ստանձնեցին պետական պաշտոններ (թեկուզ ցածր աստիճանի, օրինակ՝ շրջանային վարչահամակարգում եւ այլն)⁷³:

⁶⁸ Անդ:

⁶⁹ Գ. Թանանյան, նշվ. աշխ., էջ 10-25: 1862 թ. ընդունվեցին հույն ուղղափառ, 1865 թ.՝ հրեա միլլեթների սահմանադրությունները. տե՛ս Ս. Masayuki, նշվ. աշխ., էջ 214:

⁷⁰ Ս. Masayuki, նշվ. աշխ., էջ 223-224. տե՛ս Մ. արք. Օրմանեան, Հայոց Եկեղեցին, էջ 144: Հարկ է նշել, որ հայ պատգամավորներն ու պաշտոնյաներն իրենց քաղաքական գործունեությունն սկսում էին պատրիարքարանից՝ որպես բարերարներ կամ պատրիարքարանի աշխատակիցներ. Ե. Hartmann, նշվ. աշխ., էջ 204:

⁷¹ Անդ, էջ 83. Ս. Makdisi, նշվ. աշխ., էջ 771:

⁷² Կառավարության կազմում ոչ մուսուլմանների, հատկապես հայերի զբաղեցրած աթոռների քանակի, մուսուլման-ոչ մուսուլման հարաբերակցության մասին մանրամասն տե՛ս Ե. Hartmann, նշվ. աշխ.:

⁷³ Հայ պատգամավորների հանձնախումբը՝ Գրիգոր Զոհրապի գլխավորությամբ, 1877 թ. դեկտեմբերի 7-ի նիստի ընթացքում հայկական միլլեթի կառավարությանը ներկայացրեց նոր օրենք՝ ոչ մուսուլմաններին ռազմական ուժերում ներգրավելու վերաբերյալ: Նրանք համոզված էին, որ դա հավասար իրավունքներ պահանջելու լավագույն ճանապարհն է: Միլլեթի Քաղաքացիական խորհրդի անդամները քվեարկեցին հօգուտ հա-

Թուրք ազգայնամուլ հեղինակների պնդմամբ՝ Օսմանյան պետության անկումը պայմանավորված էր քրիստոնյաների եւ հրեաների՝ պետական քաղաքականության մեջ ներգրավմամբ⁷⁴։ Նրանց կարծիքով՝ «...դրանով իշխանությունները նպատակ էին հետապնդում ցույց տալու, որ օսմանյան գործելակերպում խտրականության քաղաքականությունն չկար», եւ «ոչ մոսուլմանները եւս, լինելով իսլամական պետության քաղաքացիներ, իրավունք ունեին զբաղեցնելու պաշտոններ՝ բացառությամբ պետության ղեկավարի, բանակի հրամանատարի, կառավարչի կամ դատավորի, քանի որ այդ պաշտոններն արտահայտում էին Իսլամի ինքնիշխանությունը»⁷⁵։

Թուրք որոշ հեղինակներ, մասնավորապես Ա. Աքգունդեզն այն համոզման է, որ «Օսմանյան պետությունը ոչ մոսուլմաններին նման իրավունքներ տվել էր մինչ բարեփոխումները» եւ «օսմանյան ղեկավարությունը դարաշրջանի ոչ մոսուլմանների վիճակը պետք է կարգավորեր այն ճանապարհներով, որոնք պաշտպանելու էին իր շահերը, այլ ոչ թե հետեւեր եվրոպական փորձին», հետեւաբար՝ «համակարգի բարեփոխումները չօգնեցին, ավելին՝ կայսրության հետագա փլուզման պատճառը դարձան»⁷⁶։ Ինչ վերաբերում է ազգային շարժումներին, ապա, ըստ Օսմանյան կայսրության պատմության ուսումնասիրողների (հատկապես բալկանյան), միլլեթի համակարգն ի սկզբանե եղել է հենց այն կադապարը, որից պետք է ձեւավորվեին ԺԹ. դարում պետականության պահանջները կայացնող ազգային խմբերը⁷⁷։

Միլլեթների կազմավորման նպատակները. Միլլեթի կազմավորման եւ գործունեության նպատակների վերաբերյալ տարաբնույթ կարծիքներ են հնչել։ Արեւմտյան մի խումբ գիտնականների (Մ. Մեյերը, Ֆ. Հիթթին) համոզմամբ՝ միլլեթների համակարգի ստեղծումն այն դասական ճանապարհն էր, որով իսլամը ձգտում էր լուծել հպատակ փոքրամասնությունների խնդիրները՝ համայնքները մեկուսացնելով իրարից⁷⁸։ Իսկ գիտնա-

յերի զինվորական ծառայության, սակայն հետագայում Հոգեւոր խորհուրդն ընդդիմացավ այդ որոշմանը, եւ այն այլեւս ընթացք չունեցավ. տե՛ս E. Hartmann, նշվ. աշխ., էջ 220։

⁷⁴ F. Öztürk, նշվ. աշխ., էջ 75-76։

⁷⁵ Անդ, էջ 75.

⁷⁶ A. Akgunduz, Tarihi Acidan Azinliklara Taninan Haklar ve Biz II (From the Historical Perspective: Rights Provided to non-Muslims and We, no: 2). տե՛ս F. Öztürk, նշվ. աշխ., էջ 82։

⁷⁷ D. Stamatopoulos, նշվ. աշխ., էջ 255։

⁷⁸ М. Мейер, Новые явления в социально-политической жизни османской империи во второй половине XVII-XVIII вв., с. 155-185, "Османская империя, система государственного управления, социальные и этнорелигиозные проблемы", Сборник статей, Москва, 1986, с. 160. Ph. Hitti, History of the Arabs, London, 2002, p. 716-717. F. Öztürk, նշվ. աշխ., էջ 73։

կաններ (Հիմնականում թուրք) մեկ այլ խումբ կարծում է, որ այն օսմանյան կայսրության կողմից ոչ մոսուլման հպատակների նկատմամբ հանդուրժողականության դրսևորում էր: Նրանք իրենց կարծիքը հիմնավորում են կայսրության որոշակի թվով ոչ մոսուլմանների, ինչպիսիք էին հույն պանարիոտները եւ հայ ամիրաները, պետության մեջ քաղաքական բարձր դիրքեր զբաղեցնելու հանգամանքով: Ըստ թուրք գիտնականների՝ «կայսրության ոչ մոսուլման բնակչությունը անկախ էր», եւ «նրանք գտնվում էին համեմատաբար լավ վիճակում, քան Եվրոպայի մոսուլմանները», կամ՝ «ոչ մոսուլմանների սոցիալ-տնտեսական դիրքը շատ ավելի կայուն էր եւ նախանձելի, քան կայսրության մոսուլման գյուղացիների ու բանվորների»⁷⁹:

Ե՛վ միլլեթների կազմավորումը, ե՛ւ Մահմուդ Բ.-ի «բարեփոխումների շրջանում» հայերի վիճակի բարելավումը առաջին հայացքից կարելի է համարել «հանդուրժողականության դրսևորում»: Սակայն, ինչպես իրավացիորեն նշում է Ու. Մաքդիսին, «քրիստոնյաները եւ մյուս ոչ մոսուլմանները հանդուրժելի էին, բայց ոչ երբեք հավասար»⁸⁰: Հանդուրժողականության պատճառները բնավ այն չէին, ինչ ներկայացնում է թուրք հեղինակ Ֆ. Օզթուրքը, թե՛ «իրականում օսմանցի թուրքերն սկսեցին յուրացնել համամարդկային արժեքների հափորոշիչներն իրենց դասական շրջանում (ԺԴ.-ԺԹ. դդ.)», կամ՝ «օսմանյան դարաշրջանում անհատի իրավունքներն ու ազատությունը շատ կարեւոր էին, դրանց օրինական հիմնավորումները պայմանավորված էին Ղուրանով»⁸¹:

Ինչ վերաբերում է «բարեփոխումներին», արդեն նշեցինք, որ դրանք պայմանավորված էին կայսրության ներքին եւ արտաքին քաղաքական գործոններով: Իսկ ահա միլլեթների կազմավորումը, հոգեւոր առաջնորդներին «ընդարձակ» իրավունքների շնորհումը, բացի նշված կարծիքներից, ունեին նաեւ հետեւյալ նպատակները.

1. Միլլեթներ կազմավորելով եւ դրանց կառավարումը հոգեւոր առաջնորդներին հանձնելով՝ կայսրության բարձրագույն իշխանությունը պահվում էր (համեմայն դեպս տեսականորեն) մեկ մարդու՝ սուլթան-խա-

⁷⁹ Stü M. Campos, Ottoman brothers, Muslims, Christians, and Jews in early twentieth-century, էջ 9. Ա. Հովհաննիսյան, «Արտոնյալ վաճառականություն» (Hayriye tüccarlari) նախաձեռնումից մինչեւ «տնտեսության թուրքացման» քաղաքականություն, Արեւելագիտության հարցեր, թ. 10, Երևան, 2015, էջ 17-50:

⁸⁰ U. Makdisi, նշվ. աշխ., էջ 774:

⁸¹ F. Öztürk, նշվ. աշխ., էջ 75:

լիֆայի ձեռքում⁸²: Այսինքն՝ մի շարք լիազորություններ տալով հոգեւոր առաջնորդներին, այնուամենայնիվ, համայնքներին առնչվող ցանկացած հարց նրանց միջոցով փոխանցվում էր սուլթանին եւ վճռվում իշխանության ցանկությամբ⁸³:

2. Սուլթանական բերաթներ ստանալու համար մեծ գումարներ էին մտնում արքունական գանձարան⁸⁴:

3. Կանոնավորվում էր հարկահավաքությունը: Այժմ Բարձր Դռան առաջ միայն միլլեթ բաշին էր պատասխանատու իր համայնքի հարկերի հավաքման եւ փոխանցման համար:

4. Ըստ ժամանակակից պատմաբանների՝ միլլեթների կազմավորումն Օսմանյան կայսրության համար ուներ նաեւ ռազմավարական նշանակություն: Նոր տարածքների նվաճման դեպքում դրանց հսկողությունն իրականացնում էին ըստ միլլեթ համակարգի, իսկ տեղի կառավարիչները փոխարինվում էին կրոնական համայնքների առաջնորդներով⁸⁵:

5. Միլլեթների կառավարումը հոգեւոր առաջնորդներին հանձնելով՝ օսմանյան իշխանությունները կայսրությունն ապահովագրում էին նաեւ հետագա ցնցումներից, որոնք կարող էին առաջանալ քաղաքացիական կառավարիչների ըմբոստության, դավաճանության կամ ռազմադաշտում զոհվելու դեպքում⁸⁶:

Հայկական միլլեթի կազմավորումն ու Կ. Պոլսի Հայոց պատրիարքության ստեղծումը եւս կայսրության հեռատես քաղաքականության արդյունք էին եւ պայմանավորված էին հետեւյալ հանգամանքներով.

1. Սուլթան Մեհմեդ Բ.-ն նախաձեռնեց Հայոց պատրիարքության ստեղծումը՝ ի հակակաշիռ Կ. Պոլսի հունական մեծաթիվ համայնքի⁸⁷:

2. Կ. Պոլսի Հայոց պատրիարքին կայսրության համայն հայության նկատմամբ ընդարձակ իրավասություններ շնորհելով՝ ինքնաբերաբար թուլացնում էին իրանի տիրապետության տակ գտնվող Մայր Աթոռ Ս.

⁸² Ph. Hitti, նշվ. աշխ., էջ 716-717:

⁸³ Ա. Սաֆրաստյան, Թուրքական աղբյուրները Հայաստանի, հայերի եւ Անդրկովկասի մյուս ժողովուրդների մասին, հ. Ա., Երևան, 1961, էջ 301- 302:

⁸⁴ Պետք է նշել, որ սուլթանական ֆերմանը հանգանակություն կատարելու լայն իրավունքներ էր ընձեռում պատրիարքին. տես Մ. Զուլայան, Արևմտյան Հայաստանը XVI-XVIII դդ., Երևան, 1980, էջ 222:

⁸⁵ B. Jarevich, History of the Balkans, Cambridge, 1990, էջ 48-62:

⁸⁶ Անդ:

⁸⁷ Տնն Յ. Սիրունի, Պօլիս եւ իր դերը, հ. 1, էջ 220-222: Ֆաթիհի «քաղաքականությունը» հայերի նկատմամբ բացատրելու համար անգամ շրջանառվել է նրա մոր հայուհի լինելու վարկածը. անդ, էջ 230-233:

Էջմիածնի եւ նրա թեմերի միջեւ կապը: Դրանով օսմանյան իշխանությունները նաեւ կանխում էին կայսրության ներքին գործերին Սեֆյանների միջամտությունը: Այս մասին Մաղաքիա արք. Օրմանյանը գրում է. «...պօլսեցիք շատոնց դադարած էին Էջմիածինէ սպասել իրենց գործերուն կարգադրությունը, վասն զի ոչ միայն հեռավոր էին, այլ տարբեր պետությունների ներքոյ գտնուելով՝ չէին կրնար Օսմանեան կառավարութեան գործերուն միջամտել»⁸⁸:

3. Կայսրության հայերին Ս. Էջմիածնից «կտրելու» քաղաքական նկատառումը միտված էր նաեւ խափանելու կայսրության տարածքում համազգային եւ համաքրիստոնեական միաբանություն ջանքերը: Այդ նպատակով օսմանյան իշխանությունները վիճահարույց իրադրություններ էին ստեղծում Կ. Պոլսի, Ադրբայջանի պատրիարքությունների, Կիլիկիո կաթողիկոսության եւ Մայր Աթոռի միջեւ ու այդ հակասությունները հարթելու համար մեծ չափի կաշառքներ շորթում⁸⁹:

4. Հաշվի էին առնվում Կ. Պոլսի հայոց պատրիարքների, ինչպես նաեւ Ամենայն Հայոց կաթողիկոսների՝ քաղաքական կողմնորոշման հարցում իրենց համայնքների համար ունեցած դերն ու կշիռը: «Սիրաշահելու» նպատակով՝ սուլթանները նրանց հատկացնում էին հողային մեծ տիրույթներ: Վակֆի իրավունքով հայոց պատրիարքների գերատեսչությունը տարածվում էր 200-ից ավելի վանքերի վրա⁹⁰:

Ըստ պատմաբանների՝ միլլեթների գործունեություն ավարտ կարելի է համարել այն շրջանը, երբ սուլթան Աբդուլ Համիդ Բ.-ն (1876-1909 թթ.) առաջ քաշեց պանիսլամիզի գաղափարախոսությունը⁹¹:

Այսպիսով՝ Օսմանյան կայսրության վարչակարգի ուսումնասիրությունը ցույց է տալիս, որ օսմանյան իշխանությունները նախորդ տեսություններից օրինակել կամ մշակել էին բազմաբնույթ համակարգեր եւ սոցիալական նորմեր՝ հնարավորին չափ դյուրացնելու համար տարաէթնիկ եւ բազմադավան հպատակների կառավարումը: Ըստ այդմ՝ հասարակությունը բաժանված էր դավանական եւ սոցիալական տարբեր խմբերի, որոնցից յուրաքանչյուրի համար սահմանված էին առանձին կարգեր՝ սկսյալ մարդկանց արտաքին տեսքից (հագուստ, բեղ-մորուք եւ այլն) մինչեւ տների արտաքին հարգարումը: Այս ամենը հաշվի առնելով՝ ամեն-

⁸⁸ Մ. արք. Օրմանյան, Ազգապատում, մասն Բ., էջ 2751. Մ. Զուլայան, Արեւմտյան Հայաստանը XVI-XVIII դդ., Երևան, 1980, էջ 223. Սիմոն Երեւանցի, նշվ. աշխ., էջ 80-81:

⁸⁹ Ա. Խաչատրյան, Նվիրակությունը Հայոց եկեղեցում, Ս. Էջմիածին, 2004, էջ 76:

⁹⁰ Մ. Զուլայան, Արեւմտյան Հայաստանը XVI-XVIII դդ., էջ 222:

⁹¹ D. Stamatopoulos, նշվ. աշխ., էջ 266:

եւին էլ չի բացառվում միլլեթ համակարգի գործունեությունը նշյալ ժամանակաշրջանում:

Ի վերջո, որքան էլ կասկածի տակ առնվեն օսմանյան դեկավար մարմինների կողմից ԺԵ.-ԺԹ. դարերում կայսրություն ոչ մոսուլման բնակչությանը տրված՝ վերը քննարկված արտոնությունները կամ միլլեթի կազմավորումն ու գործունեությունն առհասարակ, այնուամենայնիվ, դրանց մասին փաստում են ոչ միայն օսմանյան/թուրքական պաշտոնական աղբյուրները եւ հետագա ուսումնասիրությունները, այլ նաեւ Հայոց կաթողիկոսների ու Կ. Պոլսի պատրիարքների դիվաններում պահպանված վավերագրերը: Սույն հոդվածի շրջանակում ուսումնասիրված արխիվային փաստաթղթերը, որոնք պահվում են Մաշտոցյան Մատենադարանի «Կաթողիկոսական դիվանում», թեեւ կրկնօրինակներ են կամ բնօրինակի (օսմաներեն, արաբերեն) հայերեն թարգմանություններ, այնուամենայնիվ, դրանից նրանց պատմական նշանակությունը ամենեւին էլ չի նվազում:

РЕЗЮМЕ

Слово “миллет” на арабском языке означает нация, национальность, но в Османской империи оно имело иное значение, указывало на религиозную и национальную принадлежность, в частности, на не мусульманские общины.

В XV веке, Османская империя создала систему миллетов, разделив не мусульманское население империи на три религиозно-этнические общины: греческую православную, армянскую апостольскую и еврейскую. Образование и деятельность миллетов, конечно, было связано с рядом внутренних и внешних политических факторов империи.

Миллеты пользовались легальной автономией в общественной жизни. Во главе каждой религиозной общины стоял миллет-баши, то есть патриарх или раввин. Во главе армянского миллета стоял армянский патриарх Константинополя, чьи полномочия распространялись на все монотеистические общины империи.

Османские султаны, оставляя за собой право на окончательное решение, армянским патриархам давали большие полномочия в управлении армянскими религиозными и светскими общинами империи. Об этом свидетельствуют архивные документы на арабском, османском и армянском языках (султанские бераты, ферманы, корреспонденция) хранящиеся в архиве католикосов, в Матенадаране.

SUMMARY

“Millet” is an Arabic word, which means “nation”, “nationality”, but in the Ottoman Empire it had a different meaning, pointing to religious and national origin, and more specifically, to non-Muslim communities.

In the 15th century, the Ottoman Empire created Millet system, and non-Muslim population was divided into three ethnic-religious communities: Greek Orthodox, Armenian Apostolic and Jewish. Formation and activity of the Millets, of course, was due to a number of internal and external political factors of Empire.

The Millets enjoyed legal autonomy in community life. As the head of each religious community was Millet bashi (head of community), that is the patriarch or the rabbi. The head of the Armenian Millet was Armenian Patriarch of Constantinople, whose powers were extended to the entire monotheist communities of the Empire.

Ottoman sultans, retaining the right of a final decision, had granted certain priorities to Armenian patriarchs over the governance of the Armenian religious and secular communities of the Empire. The evidence of this are the Arabic, Ottoman Turkish and Armenian documents (sultans’ berats, fermans and correspondence) preserved in the archive of Catholicoses of St. Etchmiadzin, in Matenadaran Collection.

